

## नह्मया सफू म्हसीका

नह्मया नांया अर्थ “सान्त्वना” खः। वयागु बारे मेगु अप्पः धयातःगु मदु। व छम्ह एल्कोशय् च्वनीम्ह खः।

अश्शूरीतयसं ई.पु. ७२२-७२१ लय् इस्राएलीतयत् ज्वना यंकूगु खः। थ्व हे कारणं यहूदानापं अन छचाःखेरं च्वंगु देशयात अश्शूरतपाखें तसकं भय दुगु खः।

योनां (योना ३-४ अध्यायलय) निनवे नाश जुइतिनि धकाः अगमवाणी नवाःगु खः। थुकिया लिच्चः कथं फक्क निनवेय् च्वंपिं मनूतयसं थःगु पापयात स्वीकार यानाः परमप्रभुया न्ह्यःने पश्चाताप यात अले परमप्रभुं इमित क्षमा यानादिल। तर सछि दँ ति लिपा अनयापिं मनूत तसकं नुगः छाःपिं, मेपिन्त मदक्क सास्ती बियाच्चनीपिं, मेपिन्त दास यानातइपिं व घमण्डी जूगु खः। ६१२ ई.पु. जुइ न्ह्यः इमिसं थुपि पापत यानाः परमेश्वरया विरोधी जूगु खः। अथे जुयाः परमप्रभुं अश्शूरीतयत् शत्रुतय्गु ल्हातय् लःल्हानादीगु खः (१:१४; २:१)। नह्मया अगमवाणीया छुं भाग निनवेया बारे हे खः। अध्याय १ लय् परमेश्वरया तंया बारे थुइकाब्यूगु दु, अध्याय २ लय् निनवे नाश जुइगु बारे, अले अध्याय ३ लय् नं निनवे नाश जुइगु बारे ध्वाथुइक कनातःगु दु।

धलः पौ

परमप्रभुं निनवेयात न्याय याःगु १:१-१५

निनवेया पतन जूगु २:१-३:१९

## नह्म

1 निनवेया खँय् अगमवाणी। एल्कोशी नह्मं खंगु दर्शनया सफू।☆

निनवेया विरोधय् परमप्रभुया तच्चःगु तं

2 परमप्रभु नुगः मुइकादीम्ह व बदला कयादीम्ह परमेश्वर खः।

परमप्रभु बदला कयादीम्ह व तम्बय्कादीम्ह खः।

परमप्रभु थः विरोधीतयत् बदला कयादी,

शत्रुतय्गु निंति तःधंगु तं ल्यंकातयादी।

☆ 1:1 १:१-३:१९ यशै १०:५-३४; १४:२४-२७; सप २:१३-१५

3 परमप्रभु तं चायत् लिबाकादीम्ह व तसकं शक्ति दुम्ह खः।

दोषीतयत् परमप्रभुं सज्जय् मब्बयूसें त्वःती मखु।

ग्वःफय् व वाफय् वय्कःया लँपु खः

अले सुपाँय् धाःसा वय्कःया तुतिया धू खः।

4 वय्कलं ब्वबियादीबलय् समुद्र सुनावनी।

वय्कलं दक्व खुसित सुकादी।

बाशान व कर्मेलाया वाउँसे च्वंगु घाँय्ख्यः गनावनी,

अले लेबनानया वाउँसे च्वंगु गुँत इवाः जुयावनी।

5 वय्कःया न्ह्यःने पहाडत थुरथुर खाइ,

अले डाँडत नायावनी।

वय्कःया न्ह्यःने पृथ्वी थुरथुर खाइ,

संसार व अन दुपि फक्क मन्त थुरथुर खाइ।

6 वय्कःया तंया न्ह्यःने सु दने फइ?

वय्कःयागु तच्चःगु तं सुनां सह याये फइ?

वय्कःयागु च्यानाच्च्वंगु तं मि थेँ प्वंकी,

अले वय्कःया न्ह्यःने ल्वहँधीत तज्याइगु जुइ।

7 परमप्रभु भिंम्ह खः,

दुःखया इलय् वय्कः शरण कायेगु थाय् खः।

वय्कःयाके भलसा तइपिन्त वय्कलं सुसाकुसा यानादी।

8 तर वय्कलं खुसिबालं निनवेयात नाश यानादी।

वय्कलं थः शत्रुतयत्

खिउँगु थासय् लिनाछवयादी।

9 परमप्रभुया विरोधय् इमिसं न्ह्याथेँ ज्याःगु ग्वसाः ग्वसां

वय्कलं इमित भज्यंक नाश यानादी।

दुःख निकः खुसी वइ मखु।

10 इपि कंझालय् अलमलय् जुयाच्च्वनी,

अले इपि दाखमघं काय्काच्च्वनी।

इपि गनावने धुंकूगु छवख्वः थेँ भस्म जुइ।

11 अय् निनवे! छपाखें छम्ह

परमप्रभुया विरोधय् ग्वसाः ग्वइम्ह,  
व मभिं गु सल्लाह बीम्ह पिहां वः गु दु।

- 12 परमप्रभुं थथे धयादी,  
“अश्शूरीत बल्लाःसां व ल्याखय् यक्व दःसां  
इमित नाश याइ अले मदयावनी।  
अय् यहदा, जिं छन्त दुःख बियागु दु,  
अयसां आः हाकनं छन्त दुःख बी मखुत।  
13 आः इमिगु इयातुगु कु जिं छंगु ब्वहलं लिकायाबी,  
अले छिमित चिनातःगु सिखः चफुनाबी।”

- 14 अय् निनवे, परमप्रभुं छंगु बारे छगू आज्ञा बियादीगु दु,  
“आवंलि छंगु नां ल्यंकातइपिं छं सुं सन्तान दइ मखु।  
छंगु देगल्य् दुपि कियातःपि घःत व नाय्काः दय्कातःपिं मूर्ति  
जिं भज्यंक नाश याये।  
जिं छंगु चिहान तयार याये,  
छाय्धाःसा छ भिंम्ह मखु।”

- 15 स्व, पहाड पहाडय्  
भिं गु खँ न्यंकीम्ह  
व शान्तिया खँ घोषणा याइम्हय्सिगु पलाः दु।  
हे यहदा, छं थःगु नखःचखः हँ,  
थःगु भाकल पूर्वकि।  
छाय्धाःसा आः गुबलें दुष्टतय्सं हमला याइ मखुत,  
इपिं भज्यंक नाश जुइ।☆

## 2

निनवे भज्यंक नाश जूगु

- 1 अय् निनवे! छं शत्रु छन्त नाश यायेत वयाच्चंगु दु।  
छंगु किल्लात बल्लाकि, लँ बांलाक स्व,  
थः तयार जुयाच्चँ, अले छंगु फुक्क बल लगय् या।

2 परमप्रभुं याकूबयात न्हापा इस्राएल झःझः धाःगु थें  
 हाकनं झःझः धाय्कादी।  
 छायाःसा शत्रुतयसं इमित लुतय् यात,  
 अले इमिगु दाखमा भज्यंक नाश यात।

3 शत्रुतय् सिपाईतय्गु ढालत ह्याउँसे च्वं  
 अले इमिसं ह्याउँगु लं फिनातःगु दु।  
 इमिसं हमला यायेत तयारी यानाच्चंगु दु।  
 इमिगु रथय् दुगु धातु प्वालाप्वाला थी,  
 थर्सिया भालात संका च्वंगु दु।

4 रथतयत् लँय् तसकं ब्वाकी,  
 चुक चुकय् उपि थुखे उखे ब्वाँय् वनाच्चनी।  
 इपि च्यानाच्चंगु मिप्वाः थें खने दु,  
 इपि हाबलासा त्वःथें तसकं ब्वाँय् वनी।

5 वं ल्ययातःपि थः बहादुर सिपाईतयत् सःती,  
 इपि थःगु लँय् धेधे चुइ।  
 इपि तसकं हथाय् चाचां शहरया पःखाःपाखे ब्वाँय् वनी,  
 सुरक्षाया ढाल तयार याइ।

6 खुसिया बाँधया लुखा चाय्काबी  
 अले जुजुया दरबार दुनी।

7 थ्व आज्ञा जूगु दु कि  
 शहरय् च्वंपिन्त ज्वना यंकी।  
 वया दासीत सुकभतु थें  
 नुगःपा दादां विलाप याइ।

8 निनवे शहर दयकूबलय् निसें लःया पुखू थें खः  
 तर आः मनूत हथाय् चाचां पिहांवयाच्चंगु दु  
 “आसे! आसे!” धकाः तसकं सःतूसां  
 सुनानं लिफ स्वइ मखु।

9 वहः लुतय् या!  
 लँ लुतय् या!

अन धन-सम्पत्ति यक्व दु,

अले मू वंगु सामानत नं यक्व दु।

10 निनवे शहरयात लुतय याःगु दु,

अन झिजांमिजां दंगु दु व तहसनहस जूगु दु।

मनूतयगु नुगः ग्यानाः न्यले धुंकल,

इमिगु तुति थुरथुर खानाच्चंगु दु, म्ह छम्हं खानाच्चंगु दु,

इमिगु ख्वाः ग्यानाः म्हासुइ धुंकल।

11 ल्याय्म्हपि सिंहत यक्व दुगु

व तःधंगु निनवे शहर आः गन दु?

थ्व थासय् सिंह व सिंहनी थः मस्तनापं याउँक

व मग्यासे चाःहिला जुइगु खः।

12 सिंह थः मस्तयत् नकेत माक्व शिकार स्यानाहइगु,

अले वया सिंहनीया निति पशुतयगु ला कुचा कुचा याइगु।

वं शिकार यानाहःगु

पशुतयगु लां गुफा जाय्कीगु।

13 दक्व शक्ति दुम्ह परमप्रभुं धयादी,

“जि छंगु विरोधय् दु।

जिं छंगु रथतयत् च्याकाबी अले अन कुँया कुं जुइ,

अले ल्याय्म्ह सिंहतयत् तरवारं स्याइ।

जिं छंगु निति पृथ्वीइ शिकार त्वःते मखु।

अले छन्त खबर हइम्हयसिया सः

आवंलि न्यनेदइ मखु।”

### 3

निनवेयात सजॉय

1 हिया हि दुगु शहरयात धिक्कार दु!

व मखुगु खँ व

लाकाहःगु सम्पत्ति जाःगु दु,

अन गुब्सं शिकार कम जुइ मखु।

- 2 न्यै! कोरियागु सः,  
पांग्रा गुर्र याःगु सः,  
सलत ब्वाय्वंगु सः,  
रथत थर्केजूइक तसकं ब्वाकूगु सः।
- 3 सल गइपिनिगु हमला,  
प्वालाक्क वइगु तरवार  
व ज्वाल्लच्च्वंगु भाला।  
स्याना तःपिनिगु द्वै,  
सीम्हतयगु द्वै  
अल्याख सीम्हत,  
सीपिके मनूत लुफिहाना क्वदली।
- 4 थ्व फुक्क छम्ह वेश्याम्ह मिसा, जादु मन्तरया  
छम्ह मालिकनीया घच्चायाइपुगु ज्यां याना जूगु खः,  
गुम्हं थःगु वेश्याया ज्यां जात जातितय्त  
व जादु मन्तरया ज्यां वंशतय्त दास याना तइ।
- 5 दक्क शक्ति दुम्ह परमप्रभुं घोषणा यानादी,  
“स्व! जि छंगु विरोधय् दु।  
छंगु पर्सि ख्वालय् थ्यंक उला बी। जात जातितय्त जिं छंगु नांगासू  
व राज्यतय्त छंगु मछासू क्यनाबी।
- 6 छन्त फोहरं कय्काः,  
जिं छन्त क्वह्यंगु व्यवहार याये,  
जिं छन्त मनूत न्हिइकीगु खँ यानाबी।
- 7 छन्त खंपि मनूत छपाखें बिस्युं वनी अले धाइ,  
“निनवे ला नाश जुइ धुंकल। वयागु निंति सु दुखं च्वनी?”  
छन्त सान्त्वना बिइम्ह गन दु?”
- 8 अय् निनवे, छ नील खुसिया सिथय् च्वंगु  
थेबेस शहर स्वयाः बांला ला?  
वयागु प्यखरं लः दु,  
वयागु किल्ला खुसि

- अले पःखाः धाःसा लः खः।  
 9 कूश\* व मिश्र देश वयागु तःधंगु बल खः,  
 पूत व लिबिया वयात ग्वाहालि याइपि देश खः।  
 10 अयुन वयात ज्वना यंकल,  
 मेगु देशय् यंकल,  
 वया चिचीधिकःपि मस्तयूत  
 गल्लि गल्लिइ बँय् बस्वाना स्यानाबिल।  
 वया मनूतयूत चिष्टा तल,  
 अले दक्व तःधिकःपि मनूतयूत सिखलं चिनाबिल।  
 11 अय् निनवे! छ नं अय्लाःगुलुत थें जुइ,  
 छ नं सुलाच्चनी,  
 अले शत्रुतपाखें बिस्सुं वनेत छं शरण कायेगु थाय् माली।
- 12 छंगु दक्व किल्लात न्हापा सःगु फल  
 यःमरिया सिमात थें च्वं।  
 व संकीबलय् यःमरिया फल नइपिनिगु  
 म्हुतिइ हे कुतुंवइ।  
 13 छंगु सिपाईत बल्लाइ मखु  
 व ग्वाहालि मदुपि मिसात थें जूगु दु।  
 छंगु देशया मू ध्वाखात  
 शत्रुतयगु निंति चालाच्चंगु दु।  
 ध्वाखाया गजबारत मिं नःगु दु।
- 14 शत्रुतयसं घेरय् याय् न्ह्यः लःजायका ति।  
 छंगु किल्लात बल्लाका ति।  
 चा न्हायाः अप्पा दय्कि,  
 अले पःखाःत मर्मत या।  
 15 तर छं न्ह्यागु याःसा छन्त मिं भस्म याइ,  
 अले छन्त तरवारं स्याइ,  
 थुकि छिमित क्वःबुइचां थें नयाबी।  
 छ क्वःबुइचां थें ल्याखय् यक्व दःसां

\* 3:9 ३:९ कूश थ्व देश मिश्र देशया दच्छिनय् ला

सुं बचय् जुइ फइ मखु।

16 आकाशया नगुत स्वयाः अप्वः

छं थः व्यापारीतयगु ल्याः अप्वकूगु दु।

तर क्वःबुइँचातयसं याः थें

इमिसं देशयात पचिनांगा यानाः ब्वयावनी।

17 छंगु सुरक्षाया निति तयातःपि ला क्वःबुइँचां थें खः,

छंगु हाकिमत लाः क्वःबुइँचाया बथां थें खः,

गुपि चिकुलाबलय् अंगलय् प्यपुना च्वनी,

निभाः लुया वइबलय् उपि दक्वं ब्वयावनी,

इपि गन वन धकाः सुनानं सी मखु।

18 अय् अश्शूरया जुजु, छं फैजवाःत ला न्ह्यः वय्काच्चंगु दु,

छं भारदारत ला आराम यानाच्च्वनी,

छं मनूत ला पहाड पर्वतय् थुखेला उखेला जुइ धुंकल,

इमित छथाय् मुंकीम्ह सुं हे मदु।

19 छंगु घाःयात छुं वासलं नं लंके फइ मखु।

छंगु घाः तसकं ग्यानापुगु घाः खः।

सुनां सुनां छंगु बांमलागु खँ न्यनी इमिसं लयतायाः ल्हाःपा थाइ,

छाय्धाःसा छंगु गुबलें मदीगु सास्ती सुनां भोगे याःगु मदु धकाः?



**Newar**  
**Newar: Newar (Bible)**

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

---

PDF generated using Haiola and XeLaTeX on 16 May 2025 from source files  
dated 17 May 2025

838cc630-4ccf-5055-be45-10a98a141cc7